

Inatsisissatut siunnersuummut nassuiaatit

### **Nalinginnaasumik oqaaseqaatit**

Aalisarnermut aningaasaliissutinut immikkoortitat pillugit inatsisartut inatsisaata allangortinnissaanut siunnersuut immikkoortunut marlunnut sammivoq, ilaatigut aalisariutit raajarniarnermi aalisariutaanngitsut nutarternissaannut tapiissutit qaffanneqarneri ilaatigullu aalisarnerup ilaani sippuisumik pisaqarsinnaassuseqartuni isaterinissamut tapiissutit.

Sinerissamut qanittumi aalisariutit ingerlaavartumik taarsersornerinut nutarternerinullu atatillugu raajarniarnerup saniatigut aalisarnernut allanut tapiissutit 20 %-imiit 40 %-imut qaffanneri aamma nunarsuaq tamakkerlugu aningaasarsiornikkut ajornartoornermut atatillugu isigineqassaaq, tassa umiarsuaatileqatigiiffiit aningaaserivinniit allaniillu taarsigassarsisarfinniit taarsigassarsinissamut pisariaqartumik aningaasalersuinissamut ajornartorsiormata.

Aalisariutinik raajarniutaanngitsunik piginnittut 20 %-imik tapiiffigitillutik angallatinik pisisimasut suli allanik 20 %-inik qinnuteqarsinnaassapput. Taamatut suli allanik 20 %-inik periarfissaqarneq atortussanik pisineranut atuutinngilaq.

Nalinginnaasumik tapiissutinik 20 %-imiit 40 %-imut qaffaanermit atatillugu qinnuteqartunut nutaanut pisarinerani akiata tamarmiusup 10 %-ianik nammineq akiliuteqarnissaaq piunarsaaqatigineqassaaq atortut pisiat ilanngunnagit. 10%-mik nammineq akiliuteqarnissamut piunarsaaqat qinnuteqartunut siusinnerusukkut 20%-imik tapiiffigineqareersunut atuutinngilaq aamma pissarsiarinerata akiata 20%-imiit 40%-imut tapiissummik qaffaajumasunut qinnuteqaateqartunut, takuuk oqaaseqaatini § 1, nr. 4 aamma nr. 5.

Aaqqissugaanikkut naleqqussarnermut atatillugu imaluunniit maannakkut siunissamilu pisaqarnissamut periarfissanut aalisariutit angissusaasa naleqqussarnissaannut atatillugu aalisariutinut isaterinissamut tapiissutit nunani allani arlalinni tapiissuteqartarnerniit ilisimaneqartuuvoq. Tamanna siusinnerusukkut Kalaallit Nunaanni siornatigut atorineqarsimanngilaq.

Sinerissamut qanittumi aalisariutit agguataarsimanerat takutinniarlugu ataani takuneqarsinnaapput angallatit pisoqaassusii aammalu angissusaasa agguataarnerat.

Sinerissap qanittuani aalisariutit BRT aamma BT atorlugu agguarneqarput, nalunaarsorneqarneranni uuttuutit atorneqarsimasut apeqqaatillugit.

Sinerissap qanittuani aalisariutit pisoqaassusaattut allassimasut tassaapput sinerissap qanittuani aalisariutit pisoqaassusaannik takussutissiaq. Sinerissap qanittuani aalisariutit ataani allassimasut tassaapput saarullinniarsinnaanermut, qaleralinniarsinnaanermut imaluunniit raajarniarsinnaanermut akuersissuteqartut.

*Tabeli 1 Aalisariutit BRT-nngorlugit agguarneri*

BRT	Amerlassusaat	Agguaqatigiissillugu takissusaat	Agguaqatigiissillugu pisoqaassusaat
< 9,99 BRT	62	8,65	31
10 - 19,99 BRT	79	12,12	39
20 - 49,99 BRT	9	16,77	40
> 50 BRT	15	19,25	32
Katillugit	165		

Pissarsivik: KANUAANA-p 2008-mi angallatinik pisassiissutinillu nalunaarsuiffia namminerlu naatsorsuinerit.

*Tabeli 2 Aalisariutit BT-nngorlugit agguarneri*

BT	Amerlassusaat	Agguaqatigiissillugu takissusaat	Agguaqatigiissillugu pisoqaassusaat
< 9,99 BT	52	9,51	17
10 - 19,99 BT	41	13,10	10
20 -74,99 BT	10	17,64	28
> 75 BT	8	18,81	22
Katillugit	111		

Pissarsivik: KANUAANA-p 2008-mi angallatinik pisassiissutinillu nalunaarsuiffia namminerlu naatsorsuinerit.

*Tabeli 3 Sinerissap qanittuani aalisariutit pisoqaassusaasa agguarneri*

Aalisariutit pisoqaassusaasa agguarneri	Amerlassusaat
35	86
30-34	24
25-29	40
20-24	45
15-19	27

<15	54
Katillugit	276

Pissarsivik: KANUAANA-p 2008-mi angallatinik pisassiissutinillu nalunaarsuiffia namminerlu naatsorsuinerit.

Pisortanut aningaasaqarnikkut allaffissornikkullu sunniutissai:

Inuussutissarsiortunit attaveqarnerit aallaavigalugit januar 2009-mi nalilerneqarnikuuvoq angallatinik pisinissamut qinnuteqarsinnaasut arfiniliussasut, amerlanerusinnaallutilli. Taamaattorli julip qiteqqunera 2009 qinnuteqaatit taamaallaat 4-t tiguneqarput, taakkunanga angallatitaarniartut marluk qinnuteqarput, marluk angallammik iluarsartuussinissamut taperneqarnissamut qinnuteqartut. Naatsorsuutigisamit qinnuteqartut ikinnerunerat pissuteqarunarpoq qaleralinniarnep inissisimanera, saarulliit akiisa appasinneri taamaalilluni aalisarnerup annikinnera kiisalu naliginnaasumik aalisarnermi aningaasarsiornikkut tamakkiisumik inissisimaneq.

Ukiuni Aalisarnermut Aningaasaliissutinut Immikkoortitat ullumikkumut atuuffiini angallatinut qulinut pisiarineri nalingisa 20 %-iiniq tapiisoqarnikuuvoq (aammattaaq angallatinut mikinernut atornikunut tapiisoqartoqarnikuuvoq). Tapiissutit tamarmiusut 5.361.116,20 kr.-iupput.

Angallatinut pissarsinernut tapiissutit procentiat 40-inut qaffallugu inatsit akuerineqassappat aammalu siornatigut 20 %-imik tapiissutinik pereersimasut 20 %-imik tapiiffigeqqinneqarsinnaanerit periarfissinneqassappat Aalisarnermut Aningaasaliissutinut Immikkoortitani 5.361.116,20 kr.-inik aningaasartuutit qaffannerannik tapiissutaareersunut "nutaanngitsunut" kinguneqassaaq. Siusinnerusukkut 20 %-imik tapiissutinik pereernikunut tapiissutinik 20 %-imik qaffaaqqikkumallutik qinnuteqaataasimasinnaasussanut taamaattoq inatsimmi § 2, §§ 6-7, §§ 10-14 naapertorlugit nalilersuutigineqaaqqartassapput.

Aalisarnermut Aningaasaliissutinut Immikkoortitani juulip naanerani ullulerlugu 23,5 mio. kr.-it missaat sinnerupput.

Angallatinik nalunaarsuinermi marlunnik nalunaarsueriaaseqartoqarpoq. Aappaa tassaavoq BRT (Bruttoregister tons) nalunaarsueriaaserlu taanna "nutaannginneruvoq". Taamaalilluni angallatit "nutaannginnerit" BRT atorlugu nalunaarsugaapput, angallatillu nutaajunerit BT (Brutto tons) atorlugu nalunaarsorneqarnikkuupput. Sillimmasiinermi angallatit naliinut nalunaarsueriaaseq sunniuteqarpoq, tassa angallatit BT atorlugu uuttorneqarnikuusut sillimmaserneranni naleqarnerummata.

KANUAANA-mi angallatit 62-it 9,99 BRT angissusillit nalunaarsugaapput, taakkulu agguaqatigiissillugu ukiunik 31-inik pisoqaassuseqarput. Missingersersorneqarpoq angallatinut taakkununga aserorterineri tapiersiissutit 8 mio.kr. missaaniissasut. Angallatit 15-it 50 BRT-mit anginerupput, taakkulu

agguaqatigiissillugu ukiunik 32-inik pisoqaassuseqarput. Missingersersorneqarpoq 7 mio. kr. missaanni aserorterneranni naleqartut.

Angallatit BRT atorlugu uuttukkat aserorternerimi tapersiisoqarnissaanik qinnuteqarnissamut periarfissaqartut missingersersorneqarput qinnuteqaateqarsinnaasut katillugit 15 mio. kr.-inik naleqartut.

KANUAANA-mi angallit qulit 20 aamma 74,99 BT akornanni angissusillit nalunaarsugaapput, taakkulu agguaqatigiissillugu ukiunik 28-inik pisoqaassuseqarput. Allannguutissatut siunnersuut malillugu angallatinut taakkununga aserorternerimi tapiissutit katillugit 18,3 mio.kr. missaannut missingersersorneqarput. Angallatit 75 BT-mit anginerusut arfineq pingasuupput, taakkulu agguaqatigiissillugu ukiunik 22-nik pisoqaassuseqarput. Taakku aserorternerini nalingi 51,2 mio.kr. missaannut missingersersorneqarput.

Angallatit BT atorlugu uuttortarlugit nalunaarsukkat aserorternerini tapersiissutinik qinnuteqaatigineqarnissamut periarfissallit missingersorneqarput 79,5 mio. kr. naleqartut.

Taamaalilluni aserorternerimi 85 mio. kr. missaanni tapersiisoqarnissaanik pisariaqartitsisoqarpoq.

Oqaatigineqassaaq kisitsisini taakkunani angallatit agguaqatigiissillugu pisoqaassusaat tunngaveqartoq, naliusullu allassimasut ilivitsukaatut missingersersorneqartut. Naliinik naatsorsuinerimi ilaatigut tunngavigineqarpoq niuerfinni ullumikkut tuniniakkat nalingi nalinginnaasumillu missingersersuineq. Angallatit sananeqaasii (qisuk, sisak, glasfiber), aaqqissugaaneri (aalisariaatsit), maskinaat, atortut immikkut ittut, aserfallatsaaliugaaneri tunngavigalugit akit immikkoortiterneqarsinnaasimangillat.

Aserorternerimi tapersiissutinik pissarsissagaanni angallat minnerpaamik ukiunik 25-nik pisoqaassuseqassaaq. Angallatit pisoqaassusii minnerpaamik ukiunut 25-nut inissinneqarpat tapersiissutillu sillimmasiinerimi nalingisa 75 %-iannut aalajangerneqarpat tapersiissutissatut pisariaqartinneqariataarsinnaasut 10.330.664 kr.-iussapput.

Aalisarnermut aningaasaliissutinut immikkoortitat 2006-imi aallartinneqarput, taamanikkullu aningaasanut inatsimmi 20,6 mio.kr.-it immikkoortinneqarlutik. Immikkoortitani taamanikkut siunertaavoq aalisariutit nutarsarnissaannut tapersiinissaq aammalu aalisariutininut nutaanut tapiinissaq.

Aalisarnermut aningaasaliissutinut immikkoortitat 2007-imi aningaasanut inatsimmi 21 millioner kr.-inik ilaqqinneqarput. Taassuma saniatigut 2007-imi ilassutitut aningaasaliissutit 8,3 millioner kr.-it nunalerinerimi atugassanngortinneqarlutik “nalunaaqutserneqarput”.

Aalisarnermut aningaasaliissutinut immikkoortitat 2008-p naanerani katillugit 25 millioner kr.-upput.

AI 2006	20,6	mio. kr.
AI 2007	21,1	mio. kr.
Nunalerinermut aningaasaliissutitut ilassutit	-8,3	mio. kr.
2006-imi atukkat	-1	mio. kr.
2007-imi atukkat	-4,5	mio. kr.
2008-mi atukkat	-2,8	mio. kr.
2008-p naanerani imaa	25,1	mio. kr.

Inuussutissarsiortunut aningaasaqarnikkut allaffissornikkullu sunniutissai:

Piffissami taarsigassarsinissamut periarfissat ajornakusoorfiini, sinerissap qanittuani aalisariutit naleqquttuaannartinnissaat pisariaqarpoq periarfissiinissamut aalisariutit taarsernissaannut nutarternissaannullu tapiissutit 20 %-miit 40 %-inut qaffanneqarnissaat. Tamanna pingaartumik atuuppoq sinerissamut qanittumi aalisariutit ilannut allanut naleqqiullutik pisoqalisoomasunut.

Umiarsuaatileqatigiiffiit sinerissamut qanittumi aalisarnermiit anerusuttut eqqarsaatigalugit isaterinissamut tapiissutit annertuunik aningaasanik annaasaqanngikkaluarluni aalisarnermik inuussutissarsiummiit aninissamut tapersiinerusinnaapput. Tassunga peqatigitillugu sinerissamut qanittumi aalisariutinik ikilisitsineq aalisarnermik ingerlatsiinnartut annertunerusumik pisaqarsinnaalernerinik kinguneqassaaq.

Avatangiisitigut pinngortitamilu sunniutissai:

Siunnersuut naatsorsuutigineqanngilaq avatangiisimut pinngortitamulluunniit imaaliallaannarluni sunniuteqarumaartoq, siunissamili ungasinnerusumi pitsaasumik sunniuteqarsinnaalluni, tassa aalisarnermik inuussutissarsiutip iluani angallatit amerlassutsimikkut ikilinissaat naatsorsuutigineqarmat. Aalisariutinik ikilisitsineq naggataatigut CO2-mik aniatitsinermik annikillitseqataasinnaavoq.

Innuttaasunut allaffissornikkut sunniutissai:

Siunnersuut naatsorsuutigineqarpoq innuttaasunut nammineq angallateqartunut imaluunniit angallammik ingerlatseqataasunut, inatsit manna malillugu annertunerusumik aningaasaliissutissanut tapiissutisisinnaasunut imaluunniit aalisariutip isaterneqarnissaanut tapiissutisinikkut aalisarnermik inuussutissarsiummit anisinnaasumut taamaallaat sunniuteqartussaassaaq.

Oqartussanik kattuffinnillu tusarniaaneq:

Siunnersuut Aalisarneq pillugu Siunnersuisoqatigiinnut, Inuussutissarsiornermut Naalackersuisoqarfimmumut, Aningaasaqarnermut Nunanullu Allanut Naalackersuisoqarfimmumut (AN), KANUKOKA-mut, Kalaallit Nunaanni Sulisitsisut Peqatigiiffianut KNAPK-mut, Grønlandsbanken-imut aamma Sparbank Vest Grønlandimut piffissani 2. martsimiit 5 martsimut nutaatullu 8. aprilimiit 4. maj 2009 ilanngullugu tusarniutigineqarpoq.

Tusarniaanermiit allakkiat tiguneqartut aallaavigalugit Naalackersuisoqarfiup naapertuunnerusutut isigaa AN-imit akissuteqaatit aallarniutitit eqqartussallugit.

Immikkoortoq siullermi takuneqarsinnaasutut siunnersuut una ataasiarani tusarniutigineqarsimavoq taamaammallu AN-imiit tusarniaanermut akissuteqaatit arlaqartut tulliuttuni eqqartorneqassallutik.

Tusarniaanermut siullermut atatillugu AN ilaatigut tusarniaanermut akissuteqaatimini siunnersuuteqarpoq siunnersuutip saqqummiunneqarneranut atatillugu anguniakkanik siunnersuuteqarnermut tunngaviusunik erseqqissaateqartoqartariaqartoq. AN isumaqarpoq erseqqissaateqarnissaq pisariaqartoq tulluartausorlu sinerissap qanittuani aalisariutit taarsersorneqarnissaat aamma nutarternissaat pitsaaneruleqqullugu.

Naalackersuisoqarfiup tamatumunnga maluginiarpaq siunnersuummut oqaaseqaataasut kinguneratigut aaqqissuunneqarsimammata aamma AN-ip tusarniaanermut siullermut akissuteqaatai siunnersuummut ilanngullugit suliarineqarsimasut.

Tusarniaanermut tullermut atatillugu AN isumaliuuteqarpoq pilersaaruteqartoqarmat Naalackersuisunut siunnersuut saqqummiunneqarniarpoq siunnersuummut aningaasatigut kingunerisassai qulakkiivissimatinnagit. AN-ip pisariaqartitsineq erseqqissarpaa – siunnersuummut oqaaseqaatini allaaserineqartumi – assersuutigalugu ukiuni 2011-imit 2013-imut isaterinissamut tapiissutinik suli 10 mio. Kr.-inik pisariaqartitsisoqartoq.

Tamatumunnga Naalackersuisoqarfiup ilisimatitsissutigissavaa, Naalackersuisoqarfiup AN-illu akornanni ataatsimiinnerni arlaqartuni pisuni illua'tungeriit isumaqatigiissutigisaanni, siunertamut aningaasaliissuteqartoqartillugu taamaallaat tapiissuteqarnissamut tunngasortaa inatsimmi taamaallaat atuutissammat. Apeqquummut tamatumunnga tapiliullugu siunnersuutip oqaaseqaasiornerani oqaaseqatigiit § 14, imm. 1-imut ilanngunneqarput taamaallaat siunertamut pineqartumut ukiumut aalajangikkamut aningaasanut inatsimmi immikkoortinneqarsimasut sinaakkuserneqarnerisa iluannit tapiissuteqartoqarsinnaanngorlugu, inatsimmi atuuttumi pisussaaffiliisoqarmat.

Siunnersuut Aalisarneq pillugu Siunnersuisoqatigiinnut saqqummiunneqarpoq, kisiannili apeqqutit aammalu oqaasertaanik aaqqiinissamik qinnuteqarnerit saniatigut siunnersuisoqatigiit siunnersuummut oqaaseqaateqanngillat.

Kalaallit Nunaanni Sulisitsisut Peqatigiiffiat (GA) akivoq suliniut aalisarnerup aaqqissuussaanerata allanngortinnissaanik qulakkeerinnitsitsisoq GA-llu tapersorsorlugu, taamaalilluni annertunerpaamik isertitaqarnissaq periarfissinneqarmat, tamannalu inuussutissarsiu tip ataavartumik ineriartortinneqarnissaanut periarfissiisinnaavoq, aammattaarli aalisarnej ataatsimut isigalugu aalisariutit ingerlanneqartut ikilinissaannik kinguneqartussaalluni. Tassunga atatillugu Aalisarnej pillugu Ataatsimiititaliarsuup inassuteqaatai GA-p innersuussutigai.

Aalisariutinik aserorterinissaq eqqarsaatigalugu GA-p siunnersuutigaa, tapersiinnaanermut malittarisassanik siunnersuusiornissaq piaartumik aallartinneqartariaqartoq, taamaalilluni inatsisartunut ilaasortat piunasaqaataasinnaasunik siumut saqqummiussiffigineqarsinnaaniassammata. Siunnersuutigineqarpoq siunnersuutit saqqummiunneqannginnerini Aalisarnej pillugu Siunnersuisoqatigiinni suliarineqassasut.

Taakkua saniatigut GA-p isornartorsiorpaa allannguutissatut siunnersuummi aalajangersagaq Naalakkersuisut aserorterinissamut tapiissutinik qinnuteqaateqartunut taamaallaat suliaqartussamik ataatsimiititamik pilersitsiniarnerat. GA-p isumaa naapertorlugu tamanut atuuttussanik malittarisassanik sanasoqartariaqarpoq taamaasilluni Naalakkersuisut qinnuteqaatit taamaattut namminerisamik suliarisinnaaqullugit “ataatsimiititamik aammaarluni pilersitseqqinngikkaluarluniluunniit naggataatigut allaffissornermi aningaasartuutitut akitsorsaataaginnartumut.”

KNAPK toqqaannartumik siunnersuummut oqaaseqaatissaqanngikkaluarluni, § 17 eqqaassanngikkaanni, tassa KNAPK-mit paaserusunneqarmat piunasaqaatit suut ataatsimiititami aalajangersagaq taanna toqqammavigalugu atorniarneqarnersut. Siunertamut sinaakkutit atorneqarsinnaanerini KNAPK-p inaarutaasunik nalilersuinnginnermini nalileruminaatsissagaluarpaa aalajangersakkami piunasaqaatit suut saqqummiunneqanngikkaluarpata.

GrønlandsBanken-ip siunnersuut pitsaasutut isigaa Naalakkersuisut kissaatigimmassuk maannakkut aalisariutaasut qaqugukkulluunniit aalisagaatit amerlassusaannut naleqqussarneqarnissaat. Tamanna tapersiissaaq aalisarnermik inuussutissarsiornermi allanngorarpallaanngitsumik piffissamilu sivisuumi isertitaqartarsinnaanissap qulakkeerneqarnissaanut, tamannalu taperseeqqissaaq inuiaqatigiit aalisarnermik inuussutissarsiummit pissarsiaasa annertusarneqarnissaannut.

GrønlandsBanken-ip siunnersuutigaa inatsisissatut siunnersuut suliareqqinneqassasoq. Tassunga oqaatigineqassaaq siunnersuut tusarniutigalugu nassiunneqarmat siunnersuummi procentit annertussusissaat aalajangerneqarnikuunngitsut. Procentit annertussusissaat taakku massakkut suliaralugit ilanngunneqarput.

GrønlandsBanken-ip naggasiullugu oqaatigaa isumaliuutigineqarsinnaasoq kalaallit aalisarneranni pisaqarsinnaassutsip annertunerusumik nakkutigineqarsinnaanera

eqqarsaatigineqartariaqartoq, taamaalilluni ukiuni marlunni aalisariarluni aserorterinissamut tapiissutinik qinnuteqarnissaq siunertaralugu angallatit pisoqqat nunani allaneersut nunatsinnut erfalasoqartilernissaat pinngitsoortinniarlugu. Aningaaseriviup isumaa naapertorlugu taamaaliornikkut nakkutilliinikkut qulakkeerneqassaaq Kalaallit aalisarnerannut aalisariutit amerlissutaavallaartut aserorternissaannut aningaasat aningaasanut inatsimmi immikkoortinneqartut pitsaanerpaamik atorineqarnissaat.

Tusarniaareernerup matuma kingorna siunnersuut Aalisarneq pillugu Siunnersuisoqatigiinnut aamma tusarniagassanut allanut nutaatut tusarniutigeqqillugu nassiunneqarpoq (piffissaq tusarniaaffigisaq imm. 1-mi taaneqarpoq). Naalackersuisoqarfik akissuteqaammik ataatsimik tigusaqarpoq Polar Seafood A/S-imiit kalaallisoortaani oqaaseqatigiit aaqqinneqarnissaanik siunnersuuteqartoq, siunnersuullu taanna ilanngullugu aaqqinneqarpoq.

Aappassaani tusarniaanermi KNAPK-mit akissuteqaammik tigusaqartoqanngilaq. KNAPK-miit aallartitamik juli 2009 ataatsimeeqateqartoqarpoq tassanilu isaterinissamut tapiissuteqarnissamut periusissat saqqummiunneqarput, siunnersuummi qulaani taaneqartutut ataatsimiititamik pilersitsinissaq ilanngullugu. Taassuma saniatigut siunnersuut KNAPK-p siulittaasuanut tunniunneqarpoq august 2009-mi. KNAPK' miit oqaatigineqarluni oqaaseqarfigineqarpoq aningaasat pigineqartut 23,5 mio. kr.-t pigineqartut siunertamut naammangitsut.

Aamma Inatsisartut Inatsiseqarnermut Sulisoqarfianit 14. april 2009 oqaaseqaatit aamma immiunneqarput. Inatsisartunut qinersinissaq april 2009-mi nalunaarutigineqarmat siunnersuut tunuartinneqarpoq. Naalackersuisulli nutaat piumasaraat siunnersuut Inatsisartuni Inatsisartut ukiaru 2009-mi ataatsimiinnissaani suliarineqassasoq. Taamatut kissaateqarnerup kingunerisaanik taamaasilluni taamaallaat siunnersuummik aaqqissuussamik nutaamik illup iluani pingajussaarlugu tusarniaanermik pilersitsinissaq periarfissaalerpoq aamma oqaaseqaataajunnarsisut ilanngunneqarumaarlutik.

### **Inatsisissatut siunnersuummi aalajangersakkanut ataasiakkaanut nassuiaatit**

#### § 1, nr. 1-imut.

Siunertanut paragraffimi inatsimmi aamma siunertaavoq sinerissamut qanittumi aalisarnermi aaqqissugaanikkut naleqqussaannermut atatillugu akuersissutit peerneqarnerisigut angallatit isaternissaannut tapiissutit atulersinnerisigut maannakkut siunissamilu pisaqarnissamut periarfissaannut aalisariutit angissusaasa naleqqussarnissaat pillugu ilassuteqarneq. Erseqqissaatigineqassaaq sinerissamut qanittumi aalisarnermi aalisariutinik isaterinissamut tapiissutissat kisimik pineqarmata.



§ 1, nr. 2-mut

Soorlu nalinginnaasumik oqaaseqaatini eqqaaneqartoq, angallatit sinerissamut qanittumi aalisartut arlallit pisoqalilersimapput, taamaattumillu nutarterineq aqutamik ingerlanneqarnissaa anguniartariaqarpoq. Aningaaserivinniit aningaasaliisartuniillu sulii allanik aningaasalersuinissamut periarfissaqarnissaaq ilimanarpallaanngimmat, raajarniutaanngitsunik aalisakkanik allanik aalisarnermut aningaasaliinissamut tapiissutit qaffanneqarnerisigut nutarterineq aallartinniarneqassaaq.

§ 1, nr. 4-mut

Qaffaaneq pissaaq maannamut atuuttunit 20 %-niit 40 %-nut. Aammattaaq periarfissiisoqarpoq aalisariutinik piginnittut, siunnersuutip atulersinneqarnerani 20 %-imik tapiissutisisimasut sulii allanik 20 %-inik tapiiffigitinnissamut qinnuteqarsinnaasut, taamaalilluni katillugit 40 %-i tapiissut anguneqarsinnaalluni. 40 %-mut qaffaanermut atatillugu 10 %-imik nammineq akiliuteqarnissaaq piimasaqaatigineqartoq taamaallaat qinnuteqartunut nutaanut atuuppoq, takuuk § 1, nr. 5.

§ 1, nr. 5-mut

Pissarsiarineraniit tamakkiisumik akianut 10 %-imik nammineq akiliuteqarnissamut piimasaqaat 40 %-imik tapiiffigitinnissamut siullermeertumik qinnuteqartunut taamaallaat atuuppoq.

§ 1, nr. 6-mut

Kapitali 6 tamatuma kingorna kapitali 7-inngorpoq aamma kapitali 7 kapitali 8-nngorpoq.

§ 1, nr. 7-mut

§ 14 § 18-nngorpoq, § 15 § 19-nngorpoq aamma § 16 § 20-nngorpoq.

§ 1, nr. 8-mut

Kapitali 6-imut nutaamut qulequtaq nutaaq: ”Aalisarnermi aalisariutinik isaterinissamut tapiissutit pillugit aalajangersakkat”.

§ 1, nr. 9-mut

§ 14 nutaaq ilaatigut sinerissamut qanittumi aalisarnermi angallatinik isaterinissamut Naalackersuisut tapiissuteqarnissaannut tunngaveqarpoq, ilaatigullu qanoq pisoqartillugu tapiisoqarsinnaanera pillugu malittarisassaqluni. Tamatuma saniatigut aalajangersaakkap nalunaarutigivaa aalisarnermut aningaasaliissutinut immikkoortitat inatsisita taakkualu malitsigisaanik illikartitat aningaasalersorneqarnissamut pisariaqartitsisuummata. Taamaasilluni taamaallaat inatsit manna malillugu tapiissuteqartoqarsinnaavoq aningaasaliissutissatut illikartitat imaqartillugu, taanna aningaasanut inatsimmi maleruagassamik tunngaveqartinneqarpat aatsaat.

Taamasilluni maleruagassap tamatuma malitsigisaanik inatsimmut matumunnga tunngatillugu tapiissuteqarnissamut qinnuteqartoqarsinnaangilaq, Naalackersuisut ukiumi pineqartumi inatsisip siunertaanut aningaasanik immikkoortitsisimatinnagit.

Aningaasaliissutissatut illikartitat imaqarpata piumasaqaatit arlaqartut naammassineqarsimassapput. Pingaartumik siullermik piumasaqaatigineqarpoq aalisariutit Umiarsuit nalunaarsuiffianni imaluunniit Sufartsstyrelsimi angallatit nalunaarsuiffianni nalunaarsorneqarsimassapput. Tamatuma saniatigut angallatip angissusaa, pisoqaassusaa pillugu piumasaqaateqarpoq, aamma angallat ukiuni kingullerni marlunni aalisagartassaminik erseqqinnerusumik aalajangersarneqarsimasumik aalisarsimassasoq imaluunniit akuersissutinik tunineqarsimassasoq. Piumasaqaat kingulleq pingaartumik angallatit ingerlataqanngitsut isaterinissamut tapiissutisinnissaat pinngitsoortinniarnaqarpoq.

Imm. 3-mi aalajangersarneqarpoq qinnuteqartut piffissaq qinnuteqarfiusoq malillugu tulleriiaarneqartariaqannginnerat pineqarpoq, kisianni aamma aalajangersimasumik naliliinerit aamma naleqquttumik eqqarsaatiginninnerit aallaavigalugit soorlu angallatip pisoqaassusaa, aalisarneq suna ingerlanneqarneris il.il.

Imm. 4-mi aalajangersarneqarput piumasaqaatit tulleriinnilersuinermi aallaaviusussat. Qinnuteqartunik tulleriinnilersuinermi piumasaqaatit tamaasa isiginiarneqassapput, kisiannili tigussaasumik nalilersuinikkut. Suliamiit suliamut piumasaqaatit ataasiakkaat oqimaalutarneri nikerarsinnaapput.

Angallatip pisoqaassusia tonnageaalu angallatip aalisariutinut naleqquttunut iluaqutaasumik ilangussinnaanersoq nalilersuinermit pingaaruteqangaatsiarsinnaavoq. Aserorterinermit tapersiissutinik pissarsissagaanni angallat minnerpaamik ukiunik 25-nik pisoqaassuseqarnissaa inissinneqarpoq.

Aalisarsinnaanermut akuersissutinut siornatigut tunniunneqartartunut sanilliullugu pisarineqavissut atorineqarsinnaapput angallatip aalisariutinut allanut ilaasutut pisaqarsinnaassusiata paasiniarnissaanut atorineqarluarsinnaavoq.

Nunap immikkoortuini angallatip angerlarsimaffigisaani angallatit imaluunniit aalisarsinnaanermut akuersissutit amerlassusaat siunissami pisarineqarsinnaasunik missingersuinermit sanilliullugu sumiiffimmi aalisarsinnaassuseq tamarmiuseq tunngavigalugu aalisariutip aalisarunnaarsinneqarsinnaaneranik nalilersuinermit atorineqarsinnaapput.

Naggasiullugu nalilersuinivimmut tamarmiusumut pingaaruteqartorujussuusinnaavoq angallat pineqartoq aalisakkanik sunik aalisarsinnaanermut piukkunnarnersoq, aalisarnissamut periarfissat aalisariutillu pitsaanerpaamik atorpeqarnissaat eqqarsaatigigaanni.

§ 1, nr. 10-mut

Naalackersuisut § 15-imi tapiissutit annertussusissaanik aalajangersaanissamut tunngavissaqalerput. Tamanna aalisarnermut aningaasaliissutinut immikkoortitani aningaasaatigineqartut eqqarsaatigalugit aalajangersarneqassaaq. Tunniussinissanut ataasiakkaanut qummut killigititaq tassaavoq sillimmasiinermi nalip annerpaamik 75 %-ia, atortut nalingi ilanngunnagit.

§ 1, nr. 11-mut

§ 16-imi isaterinissamut tapiissutit tunniunneqareernerini angallat suneqassanersoq pillugu malittarisassanik aalajangersaasoqarpoq. Aammattaaq naatsorsuutigineqarpoq akuersissutit tamarmik angallammit arsaarinnissutaassasut. Malittarisassat erseqqinnerusut nalunaarummi aalajangersarneqassapput, § 17, imm. 3 naapertorlugu. § 16, imm. 1-imi ersippoq tapiissutinik akiliisoqarnerani angallat aserorterneqavissasoq. Tamanna imatut isumaqarpoq angallat siunertanut allanut atorpeqassanngitsoq, aalisariutinillu nalunaarsuiffimmit peerneqassalluni.

§ 1, nr. 12-mut

Siunertaq tassaavoq isaterinissamut tapiissutinut tunngasuni suliani ataatsimiititaliaq Naalackersuisunit pilersinneqartoq suliaqarlunilu aalajangiisartuussaaq. Ataatsimiititaliamut ilaasortat Naalackersuisunit toqqarneqassapput, siulittaasoq ilanngullugu. Ataatsimiititaliami ilaasortat tassaassapput angallataatileqatigiiffimmik ingerlatsinermik, inatsisinik aningaasaqarnermillu ilisimasallit. Aserorterinissamik qinnuteqaatit pillugit ataatsimiititaliaq allaffissornikkut inaarutaasumik aalajangiisassaaq. Tamanna imatut isumaqarpoq ataatsimiititaliap aalajangiinera pillugu qinnuteqartoq allaffissornikkut maalaaruteqarsinnaanngitsoq, kisiannili Ombudsmandimut maalaaruteqarnissamut imaluunniit eqqartuussivitsigut suliassanngortitsinissamut innersuunneqassalluni.

§ 1, nr. 13-mut

Aalajangersagaq manna malillugu paasissutissanik salloqittaarluni imaluunniit peqquserluuteqarnissamik siunertaqarluni immikkoortitanut taakkununga atatillugu pissarsiniarnermut paasissutissiineq pillarneqaataasinnaavoq. Allannguuteqartitsinermi ilanngunneqartoq tassaavoq pissarsiniarnermut tapiissutinik qinnuteqaateqarnermut atatillugu paasissutissanik eqqunngitsunik tunniussaqrneq, Inatsisartut inatsisaat manna malillugu

pillarneqaataalersinneqarmata. Tunngavimmik tamatuminnga atuutsitsilerneq taamaasilluni aalajangersakkamik unioqutitsinermut naapertuuttumik akiliisitaasussanngortitsisoqassaaq.

§ 1, nr. 14-imut

Aalisarnermut aningaasaliissutitut immikkoortitat pillugit Inatsisartut Inatsisaanni utertitsilluni akiliinissamut aamma pineqaatissiinermut tunngatillugu aalajangersakkat maannakkut malittarisassat atuuttut aamma isaterinissamut tapiissutit pillugit aalajangersakkanut atuutitinneqarput.

§ 1, nr. 15-imut

Allannguinermut ilutigitillugu siunnersuutigineqarportaaq taaguut "Landsstyret" "Naalakkersuisut"-nut allanngortinneqassasoq. Siunnersuut tamanna malillugu "Landsstyret"-mut innersuussineq kingorna "Naalakkersuisut"-nut innersuussinertut paasineqartassaaq.

§ 1, nr. 16-imut

Aammattaaq matumani allannguinermut atatillugu taaguut "Kalaallit Nunaanni Namminersornerullutik Oqartussat" allanngortinneqarnissaa siunnersuutigineqarpoq "Kalaallit Nunaanni Namminersorlutik Oqartussat"-mut. Matumani Inatsisartut inatsisaatigut "Kalaallit Nunaanni Namminersornerullutik Oqartussat" kingorna paasineqartassaaq "Kalaallit Nunaanni Namminersorlutik Oqartussat"-tut.

§ 2-mut

Siunnersuutigineqarpoq Inatsisartut inatsisaat 1. januar 2010-mi atuutilissasoq.